

La Quotidiana 23-10-2015, p. 22

17.25 CONTRASTS SIN SRF 1

La fugia dals auters e nossas fugias

Ils maletgs èn omnipreschents – millis e millis dad umans èn sin la fugia vers il vest. I vegnan da la Siria, da l'Eritrea, da l'Afganistan e da blers auters pajais. Ma tge han tut quels umans da far cun nus? E tge ha insumma il fenomen da la fugia da far cun nus?



En in nov format d'emissiun – cun il num «Contrasts Focus» – è la redacziun ida a la tschertga da differentes aspects da la fugia. Uschia ha il redactor Eligi Derungs scuntrà la famiglia Ramadan da la Siria, ina famiglia che viva uss en il center transitoric a Schluein e che raquinta da sia fugia. Ruedi Bruderer ha retschertgà en l'archiv filmic ed intervistà persunas fugidas ils davos 60 onns en Grischun. A pled vegnan uschia trais umens che vivan oz a Seewis, a Peist ed a Sent, trais umens che vegnan oriundamain da la Sri Lanka, da l'anteriura Tschecoslovachia e da l'Ungaria. Ma i dat era furmas da fugias main dramaticas, a l'intern dal pajais. La redactura Petra Rothmund è numnadamain ida en tschertga dad uschenumnads «Aussteigers», persunas che mitschan dal travasch e tschernan ina vita pli puril-arcaica, damai «Back to the roots». Chattà ha Petra Rothmund in giuven pèr en la Val Medel. E quel pèr di da sasez ch'els na sajan betg «Aussteigers», mabain «Aufsteigers».